



Inatsisartuni ilaasortaq Villy Olsvig, Inuit Ataqatigiit  
/Maani

### **Kangerlussuarmi mittarfik pillugu § 37 naapertorlugu apeqquteqaammut akissut**

20-06-2017  
Sags nr.: 2017 - 12631  
Dok. nr. 21164884

Asasara Villy,

Aallarniutigalugu apeqqtinnut, Inatsisartut suleriaasianni § 37 naapertorlugu nassiunneqartunut qujanaq.

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
www.naalakkersuisut.gl

### **Apeqqt 1. Timmisartorsuup Norsaq-p Kangerlussuarmut aqqusaarnermi kingunerisaanik sulisartut atorfiluppata imaluunniit eqqiaasuuppata inuit qassit atorreqartarpat?**

*Akissut:*

Mittarfeqarfinni suliassanut, akuersissummik tunngaveqartunut, Air Greenlandip timmisartuata A330-p sullinneqarneranut toqqaannartumik attuumassuteqartunut sulisut tassaapput:

Aqutsisut: Inuk 1

Timmisartuussinermut aqutsisut (ATC – Air Traffic Control): Inuit 2

Qatserisartoqarneq annaassiniartarnerlu (BOR): Inuit 7

Isumannaallisaaneq: Inuit 13

Biiliussineq: Inuk 1

Aputaajaaneq: Inuit 2-6, ukiup qanoq ilinera apeqqutaalluni

Taakku saniatigut suliat malitsigisaannik suliassat arlallit, Norsaq-p tikinneranut atatillugu toqqaannangitsumik suliarineqartussaapput. Tassalu Mittarfeqarfiit cafeteriaani, café-ani, akunnittarfiani, sannaviini aammalu kiffartuussivinni tapersersuiffinnilu allani. Taakku saniatigut CNS (Attaveqaqatigiinneq, Sumiissusersiorneq Alapernaarsuinerlu) Mittarfeqarfinniippoq, tassanilu aamma Kalaallit Nunaata silaannartaanni timmisartumik qulaassisarnermut atatillugu suliassat suliarineqartarput.

### **Apeqqt 2. Kangerlussuarmiit sinerissamut Dash 8 atorlugit angallannermi sulisartut atorfiluppata imaluunniit eqqiaasuuppata inuit qassit atorreqartarpat?**

*Akissut:*

Aqutsisut: 1

Timmisartuussinermut aqutsisut (ATC - Air Traffic Control): Inuit 2 (piffissap suliaraqarnerpaaffiusup avataani inuk 1)

Qatserisartoqarneq annaassiniartarnerlu (BOR): Inuit 4 (timmisartumik annerusumik tikittoqarsimatinnagu)

Aputaajaaneq: Inuit 2-6, ukiup qanoq ilinera apeqqutaalluni

**Apeqquut 3. Mittarfik matuneqassanngilarooq kisiannili angallanneq aaqqissuuteqqinneqarpat ilimagisinnaassanerparput ukioq 2021-p kingorna timmisartooq Norsaq qallunaat nunaanniit sumut mittarumaarnissaa aammalu aallartarumaarnissaa?**

*Akissut:*

Angallanneq pingaarneq Nuup aamma Ilulissat akornanni avitaavoq, taakkunangaanniit maanna Kangerlussuarmut akunninngikkaluarluni nunanut allanut toqqaannartumik timmisartuussisoqarsinnaalluni. Kiisalu Qaqortumut Tasiilamullu timmisartuussinermi mittarfimmik isaaffiusumik allamik annertunerusumik atorfissaqartinneqarunnaassaaq.

Kalaallit Nunaannut aamma Kalaallit Nunaanniit angallannerup ilusissaa nutaaq maanna atorneqartumit allaanerungaatsiassaaq. Tassalu Imapik qulaallugu timmisartunut ataasiakkaanut najoqqutassat sulliseriaatsimut nutaamut, ullumikkumut naleqqiullugu Kalaallit Nunaata sullinneqarneranut timmisartut amerlanerusunut atorneqarnissaannik naatsorsuuteqarfiusumut nuunneqartariaqassanngillat.

Naggasiutigalugu oqaatigisinnaavara, Naalakkersuisut sulineranni Kalaallit Nunaanni silaannakkut angallannerup ilusissaanut Inatsisartut aalajangiinerat tunngavigalugu sulimmata, tak. UKA2015, imm. 15 aamma 167.

**Apeqquut 4. Nuummi aammalu Ilulissani mittarfiit piviusunngorsimalerpata, taava Kangerlussuarmi mittarfik sunik timmisartunik orninneqartassava?**

*Akissut:*

Tamanna maannarpiaq ilisimaneqanngilaq. Tamatumunnga sullissit aningaasaliissutissaat tulleriiarinissaallu, kiisalu ilaasutigut tunngavissat kisimik apeqqutaassapput. Mittarfiit allineqarnissaannik suliaqarnermut atatillugu Naalakkersuisoqarfimma Aningaasaqarnermut Akileraartarnermullu Naalakkersuisoqarfik suleqatigalugu inuiaqatigiit aningaasaqarnerannut tunngasut misissuiffigai, tassanilu ilaatigut mittarfiit ilusissaat sukumiinerusumik misissuiffigineqassapput.

Kisiannili ilisimatitsissutigineqassaaq, Kalaallit Airports mittarfiutimini ullumikkut siunissamilu angallannermut pilersaaruserluni suliaqarmat. Nuummi Ilulissanilu mittarfinni timmisartut assigiinngitsut arlallit atorneqassasut eqqarsaatigaat, soorlu:

B737-t

B757-it

A319-it

A320-t

A330-t

Bombardier CS100

Bombardier CS300

Bombardier DHC8-Q200

Bombardier DHC8-Q400

Beechcraft 200 – Super King Air

Bell 212

AS 350

Tassalu timmisartut tamarmik taakku Kangerlussuarmut atorneqarsinnaassapput. Taamaallunilu aamma Kalaallit Nunaanni mittarfinnik allanik (Nuup, Ilulissat aamma

Kangerlussuup akornanni agguarneqartunik) peqarnissamut, aammalu timmisartut assigiinngitsut Kalaallit Nunaannut timmisartuussisinnaanissaannut periarfissiisoqassaaq.

**Apeqqu 5. Nunarput qulaallugu timmisartorpasuit angallattarunarput taakkuli arlaat angisooq 2200 meter-nik mittarfimmik takinerusumik atorfissaqartitsilersoq ukioq 2021-p kingorna qanoq nunatsinniit ikiorserneqarsinnaalissava?**

*Akissut:*

Taamatutaaq § 37 naapertorlugu siusinnerusukut apeqquumi, nr. 2017-137-mi apeqqu 2-mut oqaatigisattut: *"Tamatuma saniatigut Kangerlussuup ajornartoornermi mittarfittut (aammattaaq ETOPS - Extended Range Operation with Two-Engine Airplanes-imik taaneqartumik) qanoq annertutigisumik atorneqarsinnaanera misissuiffiqeqassaaq."*

**Apeqqu 6. Mittarfeqarfiit naatsorsuutaat 2016-imoortuni Ilulissani aammalu Nuummi mittarfiit naleqartinneqarput kr. 225 milliunit missaani, nunatsinni mittarfiit allat suli taama naleqartigisut qanoq pineqassappat?**

*Akissut:*

Oqaluttuarisaanermi Nuummi Ilulissanilu nutaanik mittarfiliorsinnaanermut periarfissat assigiinngitsorpasuit misissuiffiqeqartarsimapput, taakkunungalugu ilanngullugu assigiinngitsunik missilluisoqartarsimavoq, mittarfiit takissusii apeqquataatillugit allanngoratorujussuarnik. Taakkunani ataatsimoorfiusoq tassaavoq, siusinnerusukut annertussutsit maanna sulineri tunngavigineqartut sukumiisumik misissuiffiqeqartarsimangimmata.

Sanaartornermut aningaasartuutit amerlassusissaannut pingaarnertut sanaartugassat annertussusaat apeqquataapput, taakkunungalugu qaartitigassat annertussusissaat kiisalu mittarfiit atortulersorneqarnissaat ilaatinneqarput. Nuummi Ilulissanilu nunani tamalaani atuuttunik mittarfinnik sanasoqartussaammat, sanaartornermut aningaasartuutissat taakkunani amerlanerusussaapput. Kalaallit Nunaanni mittarfinnik allanik arlalinnik aamma sanaartortoqassasoq aalajangiunneqarpoq, taakkunanilu sanaartugassat Nuummi Ilulissanilu sanaartugassanit annikinnerussasut naatsorsuutigineqarpoq.

Kalaallit Airports A/S-imi maannarpiaq mittarfissani nutaani, mittarfiit takissusissaannut kissaatigisat aamma atortulersugaanissaannut kissaatigisat maanna aalajangersarneqarsimalersut aallaavigalugit sanaartornermut aningasartuutissat naatsorsuutigisat sukumiisumik naatsorsorneqarput.

Mittarfiit sinnerinut tunngatillugu Inatsisartut 2015-imi ukiakkut ataatsimiinneranni Inatsisartunit aalajangiinerit tunngavigalugit Naalakkersuisut sulipput.

**Apeqqu 7. Mittarfissat Nuummi aammalu Ilulissat-ni sanaartorneqarnerisa nalaani timmisartut tikinnartut aammalu aallarnartut sanaartortullu akornanni qanoq sillimaniarnikkut takorluuisoqarpa ?**

*Akissut:*

Mittarfeqarfiit Kalaallit Nunaannut mittarfinnut akuersissutsinik pigisaqartutut Kalaallit Airports piginnaatitsivoq, oqartussaasunut attuumassutilinnut, ilaatigullu Namminersorlutik Oqartussanut sananissamut akuersissummik, aamma suliasap Angallannermut, Sanaartornermut Ineqarnermullu Aqutsisoqarfimmit akuerineqarnissaanik qinnuteqarnissamut.

Mittarfeqarfinit, Kalaallit Airports-imit aamma Naalakkersuisunit kissaateqartoqarneratigut, sanaartornerup nalaani pissutsinut, timmisartuussinermi isumannaassutsimut tunngasunut akisussaaffiit piginnaatitsissutini taakkunani sukumiisumik nassuiarneqarput.

Mittarfeqarfiit suli sanaartornerup nalaani mittarfinni pioreersuni sullissinermi pissutsinut, timmisartuussinermi isumannaassutsimut tunngasunut suli akisussaasuussapput. Mittarfeqarfiit aamma Kalaallit Airports ataatsimoorlutik suliassanik naammassinnittassapput, taakkunanilu Danmarkimi Angallannermut, Sanaartornermut Ineqarnermullu Aqutsisoqarfik sulianik nakkutilliisuussaaq, tassanngaanniillu sanaartornerup nalaani timmisartuussinermi isumannaassutsip qaffasisusiata ataannarnissaa aammalu maleruagassat najoqqutarisallu naapertorlugit ingerlanneqarnissaa qulakkeerneqassaaq.

Inussiarnersumik inuulluaqqusillunga

Erik Jensen